

Colosenses

Jacheuayama

1 ¹ Atše Pablo, Jesucristbe ichmoná Bèngbe Bètsá chca yobóšeyeca, y Jesucrístbeyeca bèngbe catšata Timotéoftaca, ² quem tsbuanácha sèntsabiamná chë Colosas puebloca Bèngbe Bètsábenga imomnèngbiana. Tšèngaftanga bèngcá Jesucrístbeñe ošbuáchiyènga šmondmëna, y chca, Jesucrístbeyeca bèngbe catšátanga. Atše sèntseimpadana Bèngbe Bètsá Bèngbe Taitá, chaoma tšabe bendicionènga tšèngaftangbeñe chaotsemnama, y chaoma tšèngaftangbe ainaniñe tšabe ebionana chašmotsebomnama.

Pablo, Bèngbe Bètsábioye tbojanimpadá Colosas puebloca ošbuáchiyèngbiana

³ Bèngbe Bètsá, Bèngbe Utabná Jesucristbe Taitá tšèngaftangbiana fstseimpadana ora, cha sempre fchandbètsatschuanaye, ⁴ er bènga fsènjátatšëmbona ntšamo tšèngaftanga Cristo Jesúsbeñe tša šmojtsošbuáchema, y ntšamo tšèngaftanga nyetscanga chë Bèngbe Bètsábenga imomnènga šmababuányeshanama. ⁵ Natsanama, chë ndegombre buayenánama, chë tšabe noticiènga, tšèngaftanga tcmojanabuatambá ora, tšèngaftanga botamana šmojanuena ntšamo chë buayenániñe bejtsayancá,

chë tšèngaftanga šmojtsobena tšabe soyama jobátmana, Bèngbe Bètsábeñe jtsošbuáchiyëse. Chë šmontsobatmana soye entsama tšèngaftanga Jesucrístbeñe puerte chašmotsosbuáchema y nyetscanga chašmotsababuányeshanama. Bèngbe Bètsá celoca enduaquëcñá chë tšèngaftanga šmojtsobatmana tšabe soye. ⁶ Chë tšèngaftanga tcmojanabuayená tšabe noticiènga más bètscá entšanga montsuenana; y chca, nyets quem luarentšë entšanga montsiyena más tšabe soyènga jtsamëse. Chca entsemna ntšamo tšèngaftangbentšë tojopasacá, chë natsana te chë tšèngaftanga Bèngbe Bètsabe tšabiánama šmojanuena orscana, y ntšamo Bèngbe Bètsá puerte bonshanánaca y tšabiánaca bèngbioye šuanýenama ndegombre cmojanosérta orscana. ⁷ Y chca Epafras tšèngaftanga tcmojanabuatambá, Bèngbe Bètsabe bonshánama y tšabiánama. Epafras endmëna canya bèngaftaca Cristbiana oservená, y cha bènga fsèndbobonshana; cha Cristbiana endëtrabája bèngbe cuenta tšèngaftangbentšë. ⁸ Cha šonjáuyana ntšamo chë Uámana Espíritu yojtsama, nyetscanga Jesucrístbeñe ošbuáchiyèngbioye chašmotsababuányeshanama.

⁹ Lempe ntšamo tšèngaftangaftaca tojopasama, chë natsana te

tšëngaftangbiam a fsënjanuena orscana y mëntscoñama, Bëngbe Bëtsá sempre tšëngaftangbiam a fchandbétseimpadana, cháftaca fstscuénata ora. Bëngbe Bëtsá fsëndëimpadana, chabe Espiritu chaoma tšëngaftanga chašmotsobena jtsetatšëmbuana y jtsoertánana, chca, ntšamo Bëngbe Bëtsá yobošcá chašmotsamama, tšëngaftanga tšabá chašmotsetatšëmbuama. ¹⁰Y chca, tšëngaftanga šmochantsobena jtšiyenana jtšamëse ntšamo Bëngbe Utabná yobošcá, y sempre šmochántsama ntšamo chabiam a tšabá yomncá. Ntšamo tšëngaftanga chašmojtšiyencá tšabe soyënga jtšamëse, chentsana nyetsca tšabe soyënga echanjóbcna, y tšëngaftanga más tšabá Bëngbe Bëtsá šmochantsábuatma. ¹¹Atše, Bëngbe Bëtsá sëntseimpadana, chabe puerte bëtscá obenánaca cha chaoma tšëngaftangbe ainaniñe bëtš añemo chašmotseboimnana; y chca, tšëngaftanga chë padecena soyënguiñe chašmojtsemna ora, puerte uantadënga chašmotsemna, y ainaniñe añémoca Bëngbe Bëtsábeñe becá chašmotsobátmanama. ¹²Y puerte oyejuayënga Bëngbe Taitá šmochántsatschuanaye, nda iuama bënga chamotsobena ntšamo cha chabe entsanga jatšatayama tojašebuachenacá jtseboimnana. Tšëngaftanga šmochanjóyëngacñe ntšamo cmojtšëtocancá celoca, chë corente buashinjinñana luarentše. ¹³Bëngbe Bëtsá bënga šojatsebacá, Satanás, chë ibetiñe luarentša mandayabe cucuatšëntšana, y tojama chë chabe bonshana Uaquiñabe amëndayana bëngbe ainaniñe chamotseboimnana; ¹⁴chábeyeca Bëngbe Bëtsá Satanásbe

cucuatšëntšana šojatsebacá; o mëntsá, chábeyeca Bëngbe Bëtsá bëngbe bacna soyënga šojtsaperdoná.

**Cristo tojanóbanayeca,
entsanga Bëngbe Bëtsáftaca
tšabá jtsatsmënana**

¹⁵Cristo tmonjáninñe ora, bënga tmojántatšëmbona ntšamo Bëngbe Bëtsá yomnana; entsanga imojobena cha jinñama, pero Bëngbe Bëtsábioye ndoñe. Cha, chë Bëngbe Bëtsabe Uaquiñá, ya natsana yojtsemna lempe chë Bëngbe Bëtsá tojanma soyëngama; y cha lempe chë soyëngama más uamaná endmëna. ¹⁶Chábeyeca Bëngbe Bëtsá tojama lempe ntšamo celoca y quem luarentše yobinñcá, lempe ntšamo chë entsanga imobena o ndoñe mondobena jinñama soyënga, y chë espíritëngnaca chë imobena ínñëngbioye jtšamëndayana y obenana imobomna. Bëngbe Bëtsá, chábeyeca y chabiam a tojama, lempe ntšamo quem luarentše yobinñcá. ¹⁷Bëngbe Bëtsá cabá nyetsca soyënga ndama ora, Cristo ya yojtsemna; y chábeyeca mora yomna, lempe ntšamo quem luarentše chaotsemnama yojamncá. ¹⁸Cha endmëna nda nyetscanga Bëngbe Utabnábeñe ošbuáchiyënga iuamëndá, ntšamo chë bestšaše nyetsca chë cuerpentša soyënga jtsemandayancá. Cha endmëna nda iuama ošbuáchiyënga tsëm tšabe vida chamotseboimnana, y cha endmëna chë Bëngbe Bëtsabe más bëtš Uaquiñá. Bëngbe Bëtsá tojanma, chë cachinñe ainënga mochtsatsmënënguentšana, cha chë natsaná chaotsemnama; nyë cha canña chë más uámana luare chaotseboimnama, nyëtšcañe chaotsemándayama. ¹⁹Er Bëngbe Bëtsá yojanjuabná cachabiam a tšabá yojamna, lempe ntšamo cha yomncá,

chabe Uaquiñábeñnaca chaotsemnama,
²⁰ y Bèngbe Bètsá tojánbošena,
 Crístbeyeca nÿetsca soyènga quem
 luarentše y celoca, cháftaca tempcá
 tšabá chaotsatsmènama. Bèngbe Bètsá
 chë soye tojanma, chabe Uaquiñá
 cruciñe tojanóbana ora y chabe buiñe
 tojanábuashana ora; y chca, Bèngbe
 Bètsá tojanma nÿetsca soyènga quem
 luarentše y celoca, cháftaca tempcá
 tšabá chaotsatsmènama.

²¹ Tempo, tsèngaftanga Bèngbe Bètsá
 stètsoye šmojanquedá y chábioye
 uayayènga šmojamna, bacna soyènga
 šmojanjuabná y šmojánama causa;
²² pero mora chabe Uaquiñáftaca, cha
 mo canÿe entsacá jóbaneše, Bèngbe
 Bètsá tojama tsèngaftanga tempcá
 tšabá cháftaca chašmotsatsmènama;
 y chca tojama, tsèngaftanga chabe
 delante nÿets tempo chašmotsemnama;
 chora tsèngaftanga, chabe entsanga,
 ainaniñe ndocna bacna soye
 ndbomnènga chašmotsemnama,
 y ndocná chaodayana ntšamo
 šmojamcá ndoñe tšabá yontsemna ca.
²³ Pero tsèngaftanga cmontsamna chë
 bètsá ošbuáchiyana šmondobmnana
 nÿets tempo jtsebomnana, Bèngbe
 Utabnábeñe jtsošbuáchiyama
 ndocna te ntjabanacá. Nÿets
 tempo chë tšabe noticiènguñe
 šmochtsošbuáchiye, y ndoñe
 šmatjaleséncia ndocná tsèngaftangbe
 ošbuáchiyana chaotrocama; y nÿe
 chca puerte jtsošbuáchiyèse Bèngbe
 Bètsábeñe šmochtsobátmana,
 ntšamo tsèngaftanga šmojanmcá,
 Jesucristbiana buayenánama
 šmojanuena ora. Chë buayenánana
 endmèna ntšamo ba entsanga
 nÿetsca quem luarentša entsángbioye
 tmojabuayenacá, y atšbe trabajo
 endmèna cach tšabe noticièngama
 entsanga jtsabuayiynayana.

**Pablo, ošbuáchiyènga jasérviamo
 trabajo tmojanbonÿé**

²⁴ Atše corente sènjesoyejúa
 mora tsèngaftangbiana jasúfriama
 stsobenama. Ba entsanga entsamna
 jasúfriana Cristo jasérviamo, y
 atše sèntsesufrina ntšamo Cristo
 tojansufricá, mora atše jtseufrinèse
 chabe cuenta, ntšamo jasúfriama
 yomncá. Y ntšamo sèntsesufrinacá
 entsemna Crístbeñe ošbuáchiyèngbe
 tšabiana, chë chabe cuerpcá
 imomnènga, chènga Crístbenga
 bétsemnama. ²⁵ Bèngbe Bètsá
 atše šojábema chë Jesucristbeñe
 ošbuáchiyèngbe canÿe ujabuachaná.
 Cachá chë trabajuama šojanábuayana,
 chca jamèse, tsèngaftangbe tšabiana
 chaotsemnama. Chë trabajo endmèna,
 lempe ntšamo cha tojayancá entsanga
 jábuayenana. ²⁶ Bèngbe Bètsá nÿetsca
 entsanga ndoñe tonjanalesenciá,
 quem luare jobojátšama orscana
 y nÿets tempo chë buayenánama
 chamotsetatšèmbuama; pero mora,
 chábenga imomnènga chë soye
 cha tojinÿanyé. ²⁷ Bèngbe Bètsá
 yoboše, chabe entsanga imomnènga
 chamotsábuatmama ndayá tempo
 chènga ndoñe tonjaninÿanyecá;
 y yoboše chë ndoñe judiènga
 jinÿanyiyama tša bèts y tšabe soye
 yomna chë ndegombre buayenánana,
 ndayá tempo inÿenga ndoñe
 tonjaninÿanyecá. Chë tempo ndoñe
 yonjanótatšèmbu buayenánana
 entsemna, Cristo tsèngaftangbe
 ainaniñe vojtsiyena, y chábeñe
 puerte jtsošbuáchiyèse šmojtsovena
 jtsobátmanana, Bèngbe Bètsá
 puerte bètsétsanga y uámanènga
 chácmbiamama, batšá ntšamo cachá
 yomncá. ²⁸ Bènga nÿetscángbioye
 Jesucristbiana fchandbètsabuayiynaye;

fchandbétsetsétsnaye ndayá chënga ndoñe yontsamna jtsamana, y fsëndbétسابuatambaye nyëts osertanánaca ndayá chënga aíñe yojtsamna jtsamana, y chca, nyëtscángbioye Bëngbe Bëtsabe delante junatsama, puerta ošbuáchiyënga y osertánënga Bëngbe Bëtsabe soyënguñe, chënga Crísoftaca cánýiñe mo canýacá jtsemnëse.

²⁹ Chca chaotsemnana, atše bëtscá sëndëtrabája; y chca séntsama, chë Cristo yojtsama atše chaitsebomnana bëtš obenánaca.

2 ¹ Atše séntseboše tšëngaftanga chašmotsetátšëmbo, Bëngbe Bëtsá becá tsimpadánama, tšëngaftangbioye jubabuáchama, chë Laodicea puebloquënga Jesucrístbeñe ošbuáchiyënga y nyëtscanga chë ndocna te atše šmonjinýe ošbuachiyëngnaca.

² Atše chca sëndama, tšëngaftanga y chënga ainaniñe bëtš añemo chašmotsebomnana, y cánýiñe mo canýacá chašmotsemanama, nyëtscanga jtsenbobonshánëse. Chca, nyëts osertánana tšëngaftanga chašmotsebomnana, y chë tempo Bëngbe Bëtsá entšanga ndoñe tonjaninýanýe buayenánama chašmotsetatšëmbuama, y chë buayenánana Cristbe soye entsemna.

³ Mo canýe bëtscá bomnana iytémëna soy cá pero mora ya uñýenana, cachcá Crístbeñe entsemna nyëts osertánana y obenana Bëngbe Bëtsá jtsabuatmama. Chë soye tempo Bëngbe Bëtsá entšanga ndoñe tonjaninýanýe, pero mora Cristo yojtsama bënga chë uámana soyënga chamotsebomnana. ⁴ Atše chca séntsichamo, botamana palabréngaca ndocná chacmondáingñëma. ⁵ Er masque choca tšëngaftangaftaca atše ndoñe quetsátsmëna, atšbe ainana aíñe

choca tšëngaftangaftaca entsemna; y atše puerta séntsoyejuá tšëngaftanga šmatenëyeunanama y nyëts tempo Bëngbe Bëtsábeñe šmojtsošbuáchema.

Crísoftaca cánýiñe mo canýacá jtsemnëse, entšanga ndegombre tšabe vida jtsebomnana

⁶ Tšëngaftanga Jesucrístbeñe ošbuáchiyënga šmojanóbiamana ora, šmojanayana: “Cristo Jesús, Bëngbe Utabná entsemna ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cánýiñe mo canýacá tojtsemnacá. ⁷ Chca šmontsobena jamana, cháftaca cánýiñe mo canýacá nyëts tempo jtsemnëse. Šmochtsiyena jtsamëse ntšamo cha tojabuatëmbacá y cada te más chca. Cabá más šmochtsošbuáchiye chë Cristbiana buayenana soyëngama, ntšamo tcmojabuatambacá; y Bëngbe Bëtsá sempre šmochtsatschuanaye.

⁸ Cuedado šmochtsebomna, ndoñe šmatjaleséncia ndocná chaondétsamama tšëngaftanga jtsajbanama Crístbeñe ošbuáchiyana jtsebomnana. Chca entšanga montseboše juabnéngaca tšëngaftanga jáingñama, nyë básefta entšangbe juabnénga y tondayama ndoservena juabnénga. Chë juabnénga jtsóbocanana ntšamo bëtš taitanga básëngbioye mondbetsabuátambayentšana y chë espíritëngbentšana, ndëmuanýëngbiama entšanga jtsejuabnayana chënga nyëtsca soyënguñe imománda ca; pero Crístbentšana chë juabnénga ndoñe ntsóbocanana.

⁹ Cristo endmëna cachcá ntšamo Bëngbe Bëtsá yomncá, masque mo canýe entšacá quem luarentšë

yojëftsiyena; ¹⁰ y Bëngbe Bëtsá tojama tsëngaftanga ndegombre tsábe vida chašmotsebomnama, Crístoftaca cánýiñe mo canýacá bétsemnayeca; y Cristo, nyetsca chë mándayënga y obenana bomnëngbiana más uamaná endmëna. ¹¹ Tsëngaftanga Crístoftaca cánýiñe mo canýacá bétsemnayeca, mo uinýnananëngcá šmontsemna, tsëngaftanga Bëngbe Bëtsabe entšanga šmomnama. Quem uinýnanánana ndoñe quenátsmëna mo chë más delicadentše base bobachtema tmojatëtšcá, cach entšángbeyeca ntšamo judiënga monduamancá, pero aíñe entsemna cach Cristo nda tcmojauinýnaná; y chë uinýnanánana entsemna, tsëngaftangbe ainanentšana Cristo bacna juabnënga jabuajuánayana. ¹² Tsëngaftanga šmojánenabaye ora, enjamna mo ntšamo cach Cristo tmojanatbontsacá tsëngaftanga utebuantsánënga cuaftsemncá, er tsëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tsëngaftanga šmojánenabaye ora, enjamna mo tsëngaftanga chašmatayenama Bëngbe Bëtsá cuafjamcá, er mora tsëngaftanga mo tsmëma entšangcá šmondoyena. Chca tojanopasá, Bëngbe Bëtsá obená bétsemnama tsëngaftanga šmojtsošbuáchema, y chë obenana tojama Cristo cháuatayenama.

¹³ Inýe tempo tsëngaftanga Bëngbe Bëtsabiana mo obanëngcá šmojamna, yapa bacna soyënga jtsamama šmojanamana causa y uinýnanánënga mo Bëngbe Bëtsabe entšangcá ndoñe šmonjámnayeca, pero aíñe šmojanamana bacna soyënga jtsamana nýe ntšamo šmojanbošcá. Morna Bëngbe Bëtsá tojama tsëngaftanga

tsábe vida chašmotsebomnama, Crístoftaca cánýiñe mo canýacá jtsemnëse, y Bëngbe Bëtsá bëngbe nyetsca bacna soyënga šojtsaperdoná. ¹⁴ Mo nda ba ndebëñënga tojtsabamna y chama tsbuanachangá tojtsamna y chiñe tojtsayana chënga obligaciönaca imojtsemna chë ndebénana pronto jtobocana ca, pero chë entšá chëchangá tojtsandbiana chë entšanga cha ndoñe más chamondëtsendebénama, Bëngbe Bëtsá cachcá tojama, bacna soyëngama bënga šojtsaperdoná ora. Jesús bëngbe bacna soyëngama cruciñe tojanóbana ora, enjamna mo Bëngbe Bëtsá bëngbe ndebénana tojtsanpochocá cuenta. ¹⁵ Jesucristo cruciñe tojanóbanayeca, Bëngbe Bëtsá tojanayëñaná Satanás y chabe bacna espíritënga obenana bomnënga y ínýëngbiöye amëndayënga; y nyetsca entšangbe delante tojaninýanýé cha chënga jtsamëndayama yobenama, mo canýe reyca chë ínýënga tojayëñaná ora, chabe entšangftaca natsana jtsayana y chë ayëñanánëngna ústonoye.

**Ainaniñe becá jtsebošana
chë ošbuáchiyëngbiana
celoca yomna soyënga**

¹⁶ Ndoñe caso šmattsabiamnaye, ndoñe tsábá šmontsama ca ínýënga tsëngaftangbiana tmojtsichamo ora, ndayá tsëngaftanga šmëtsesaye o šmëtsosfšëšnayama, o ndayá aíñe o ndoñe šmondbëtsamama Bëngbe Bëtsá jadórama fiestënga ora o shbojueta fiesta ora, o jóchnama tese. ¹⁷ Bayté entsemna, Bëngbe Bëtsá entšangbe cucuatšíñe chë mandënga tojánboshjona, chë soyëngama bënga jabuátambama. Chë mandëngaca Bëngbe Bëtsá yojaninýanýnaye ndayá más chcoye jopásama;

entsángbioye yojaninñanñaye ndayá Cristo yochjanmama.

¹⁸ Báseftanga mondmëna y chënga mo nduamanëngcá entsángbeñe jtsebínñana, pero tsoye cachënga corente uámanënga jtse nobiamnayana y angelënga jtsadórayana, mo Bëngbe Bëtsá cuaftsemncá. Ndoñe caso šmattsabiamnaye, tsëngaftanga ndoñe tsábá šmontsama ca chënga tmojtsichamo ora, ntšamo chënga tmojtsichamcá tsëngaftanga ndoñe šmontsámayeca. Chënga jtsichámuana bëts soyënga mo otjenayoquécá tmojinñe ca, y nñe cachënga puerte jtsenábotamnayana, pero chca chamotsamama razón ndoñe quemátsbomna, er nñe ntšamo inñe entsanga imnetsejuabnaycá chëngnaca cachcá jtsejuabnayana. ¹⁹ Chënga Jesucristoftaca cánñiñe ndoñe tmonjoquedanga, y Cristo endmëna chë nñetsca ošbuáchiyëngbe amëndayá, mo chë bestšaše nñets cuerpo jtsemandayancá. Canñe cuerpiñe chë bestšaše jtsamana nñets cuerpo chaóbochema, ntšamo Bëngbe Bëtsá tojtsebošcá, chë cuerpo ndayá jasama chaotsebomnama jtsamëse, y nñetsca chë cuerpentša soyënga chamenefjanama jtsamëse. Cachcá, Cristo jtsamana nñetsca ošbuáchiyënga cánñiñe mo canñacá cháftaca chamotsemnana, y cada te más tsábá cha chašmotsábuatmama.

²⁰ Cristo tojanóbana ora enjamna mo tsëngaftángnaca cuafjobancá, y Bëngbe Bëtsá tsëngaftanga cmojatsebacá chë quem luarentše imománda espíritëngbe cucuatšentsana. As, čtsëngaftanga ndáyeca šmojtsiyena jtsamëse mo chë nñe quem luarama enojuabnayëngcá? čNdáyeca tsëngaftanga cabá šmobedecena chca mandënga, mo: ²¹ “Chë soye ndoñe matsbanana, chca

soye ndoñe catjase, o chë soye acbe cucuatšeca ndoñe catjaca ca”?. ²² Lempe chë mandënga, chë ndayá canña ndoñe bontsemna jamana, nñe soyëngama jtsayanana, y tempo tojochnëngo ora, chë soyënga jtsopochócana y chora tondaye ntsámanana. Chë mandënga jtse mnana nñe ntšamo entsanga mondbetsamcá y inñyëngbioye mondbetsabuatambaycá. ²³ Ndegombre, ba entsanga jtsejuabnayana chë mandënga tmojamëngbiana, puerte osertanánaca chca tmojama ca, pero ndegombre chca ndoñe quenátsmëna; er chënga jtsichámuana, ntšamo Bëngbe Bëtsá jadórana yomncá imojtsabuatambá ca, jtsabuátambayana entsá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entsángbe ainanentsana ndoñe ntjajuánana chë bacna soyënga jtsamama juabnënga.

3 ¹ Cristo cháuatayenama Bëngbe Bëtsá tojanma ora, enjamna mo tsëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tsëngaftangbe ainaniñe puerte šmochtseboše ndayá Bëngbe Bëtsá celoca tsëngaftangbiana yobomncá; y choca, Cristo uámana puestentše endëtbemana, Bëngbe Bëtsabe catšbioica. Y šmochtsinñinñaye chca šmojtsebošama, ntšamo jtsamëse mora šmojtsiyenama. ² Tsëngaftanga nñets tempo chë celoca soyëngama šmochtsejuabnaye, ndoñe chë nñe quem luarentše yomna soyëngama. ³ Tsëngaftanga Crístoftaca cánñiñe mo canñacá jtse mnëse, jtse mnana mo tsëngaftanga ya cuafjobancá, er mora ya ndoñe quešmátiyena tempcá jtsamëse. Cristo, Bëngbe Bëtsáftaca

cányiñe mo canýacá endmëna, y Cristo endmëna nda mora tsëngaftangbe vida yojtsinýena. ⁴Ndegombre, Cristo endmëna nda endama tsëngaftanga tsábe vida chašmotsebmnama; y quem luarentse cha cachiñe chaojtonýná ora, tsëngaftángnaca chentse cháftaca šmochántsemna, y chora ntšamo Cristo corente uamaná y bëtšá yomnama Bëngbe Bëtšá yochjinýanýiyá, tsëngaftangbiámnaca echanjínýanýiye más bëtšétsanga y uámanënga šmojtsemnana.

Tempsca vida y morsca vida

⁵Tsëngaftanga, ntšamo chë nýe quem luarama enójuabnayënga mondbetsebošcá bošana lempe šmochtsajbaná. Ndocná chaondétseboše ndaye bacna soye boyabása o shembásaftaca jtsamana, ni chca soyënguñe ndoñe chaondétsejuabná; ndoñe chaondëtsiyena nýe ínýengbiama bacna juabnënga jtsebmñese, y ndoñe chaondétseboše nýe bëtscá soyënga ínýengbiama más jtsebmñana, er chca jtsamana jtsayanana, chabiama más yojtsámama soyënga jtsebmñana, Bëngbe Bëtšá jatsbobonshánama. ⁶Er entšanga mondmëna y chënga chca soyënga jtsamama jtsebošana, y Bëngbe Bëtšá ndoñe ntseyeunanana. Chca entšángaftaca Bëngbe Bëtšá puerte bochanjetna, y echanjamánda chë uabouana castigo chéngbeñe chaotsemnana. ⁷Y tempo, tsëngaftanga šmojaníyena jtsamëse, sempre nýe chca bacna juabnëngaca, ⁸pero mora tsëngaftanga cmontsamna lempe quem soyënga stëtsoye jaquédana: ínýengaftaca jetnana, ínýengaftaca rábiaca jtsemnana, ínýabioye ntšamo jáborlama jtsebošana, ínýengbioye joyánguanguana, y ndoñe

tsábe palabrënga jtsóyebuambnayana.

⁹Ndoñe šmattsenbuambnaye, er ntšamo tempo šmojamncá mora tsëngaftanga ya ndoñe cachcá quešmátsmëna, y mora ndoñe quešmátíyena jtsamëse ntšamo tempo šmojanamcá. ¹⁰Y mora tsëngaftanga šmojashjache jtsemnana mo tsmëma entšangcá, y ntšamo tempo šmojanamcá ndoñe cachcá quešmátama. Bëngbe Bëtšá chca tsmëma entšangcá tcmojábíama; y cha nýets tempo yojtsama, tsëngaftanga cada te más ntšamo cha yomncá chašmotsemnana, chca, corente tsábá cha chašmuábuatmanama. ¹¹Chíyeca, ndayá Bëngbe Bëtšá tojamama, ndoñe judiënga y judiënga cachcanga mondmëna; chë más delicadentse base bobachtema tétšenënga ndoñe más uámanënga quemátsmëna chë ndoñe chca mondmënëngbiama; chë ínýe luarëngocana áshjajnënga, bën tjoye oyenënga, chë nýe ínýabíama nýets tempo oservénënga y chë cachëngbiama trabájayënga, nýetscanga cachcanga mondmëna. Chë nýe ndayá uámana endmëna Crístbeñe jtsóšbuáchíyana y nýetsca ošbuáchíyëngbe ainaniñe cha yojtsemna jtsemándayama.

¹²Tsëngaftanga Bëngbe Bëtšábenga šmondmëna. Cha cmondábabuanýeshana y tcmojabacacá chabe entšanga chašmotsemnana; chíyeca, tsëngaftanga cmontsamna ínýenga jtsinýanýayana nýetscangbiama jóngmiama šmuamanama, tsábe juabna ínýengbiama sempre šmnétsebmñana, cada ona chë ínýenga chabiama más uámanënga cuaftsemncá imnétsejuabnayama, nýetscanga puerte bonshanánaca šmnétsënýayama, y nýetsca padecena soyënguñe

corente uantadënga šmomnana.

¹³ Njëtscanga šmochtsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe Bëtsá tšëngaftanga tcmojaperdonacá, tšëngaftángnaca cachcá ínÿenga šmochjáperdonaye. ¹⁴ Lempe chë soyëngama más enduámama njëtscanga jtsenbobonshánana. Njëtscanga šmojtsenbobonshánëse, tšëngaftanga šmochantsobena sempre lempe chë inÿe soyënga corente tšabá jtsamana, ntšamo ndegombre chë soyënga jamama yomncá. ¹⁵ Cristo endama tšëngaftangbe ainaniñe tšabe ebionana chašmotsebmomnana. Chë tšëngaftangbe ainaniñe tšabe ebionánaca šmochtsiyena njëtscanga natjémbana, Jesucristbeñe ošbuáchiyënga quetsomñecá. Bëngbe Bëtsá tcmojáchembo tšëngaftanga njëtscanga cánÿiñe mo canÿe cuerpcá chašmotsemnana, y chca, natjémbana chašmotsiyenama. Bëngbe Bëtsá sempre šmochtsatschuanaye.

¹⁶ Chë Cristbe puerta tšabe buayenana soyënga tšëngaftangbe ainaniñe njëts tempo šmochtsambaye. Njëts osertanánaca šmochtsenbuátëmbaye y šmochtsenbuayiynaye. Njëts ainánaca šmochjacánta chë Salmos librësañe uabemana cantënga, chë Jesucristbe soyëngama cantënga, y chë Bëngbe Bëtsabe Espíritu iuama tšëngaftanga chašmotsobena jacántama soyënga; chca šmochjama Bëngbe Bëtsá jëtschuayama. ¹⁷ Y lempe ntšamo chašmojtsama o chašmotsichamcá, Bëngbe Utabná Jesúsbeñe ošbuáchiyënga quetsomñecá chca šmochjama, sempre Bëngbe Bëtsá Bëngbe Taitábioye, chábeyeca jtsatschuanayëse.

Ntšamo ínÿengaftaca jtsiyenama

¹⁸ Shémanga, šmochtsatšëmbo tšëngaftangbe boyanga chë yebnentša mándayënga imomnana, y njëts tempo chca jtsejuabnayëse šmochtsiyena, er tšëngaftanga Bëngbe Utabnábeñe ošbuáchiyënga quetsomñecá, chca cmontsamna.

¹⁹ Boyanga, tšëngaftangbe shémanga sempre šmochtsababuánÿeshana, y podesca palabréngaca ndoñe šmattsëtsëtsnaye.

²⁰ Básenga, tšëngaftangbe bëtsëtsanga nyëtscañe šmochtsayaunana; chca šmojtsamëse, Bëngbe Bëtsá oyejuayá echántsemna.

²¹ Taitanga, ndoñe šmattsama tšëngaftangbe básenga chautënama, ainaniñe tondaye añémoca chënga ndoñe chamondëtsatsmënama.

²² Tšëngaftanga chë njëts tempo nÿe ínÿabiamama oservénënga, tšëngaftangbe nduiñënga nyëtscañe šmochtsayaunana, y ndoñe nÿe chënga tcmojtsénÿa ora, mo nda nÿe entšangbe delante tšabá joquédama tojtsebošacá, ndayá chënga šmochtsayaunana njëts ainaniñe ndegombre tšabe juabnéngaca, er tšëngaftanga Bëngbe Utabnabiamama corente respeto šmondmbomna.

²³ Lempe ntšamo chašmojtsamcá, njëts tšëngaftangbe añémoca šmochtsama, mo Bëngbe Utabná ndegombre cuafseservencá, y ndoñe nÿe entšangbioycá. ²⁴ Tšëngaftanga ya šmondëtatšëmbo, ntšamo cha chabe entšanga tojašebuachenacá mo uacanancá, Bëngbe Utabná tšëngaftanga cmochjátšatayama. Er Cristo, chë Utabná, endmëna ndábenga tšëngaftanga šmomnana, y cha šmondëservena. ²⁵ Pero chë ndoñe tšabe soyënga tontsamábioye, Bëngbe Bëtsá bochanjacastíga, ntšamo chë

entśá bacna soyënga tojamcá, er Bëngbe Bëtsabiana nyetscanga cachcá monduámána.

4 ¹Y tšëngaftanga, ndëmuanyëngbiama ínÿenga nyets tempo imoservena, nyetsca soyënguine tšabá šmochtsama, y nyetscangbiama cachcá šmochtsemna, chë nyets tempo nÿe tšëngaftangbiama oservenëngaftaca, er tšëngaftanga šmondëtatšëmbo celoca canÿa endmëna, ndabiama tšëngaftángnaca oservenënga šmondmëna.

Ošbuáchiyënga jábuayenama

²Nÿets tempo Bëngbe Bëtsáftaca šmochtsencuëntaye, ntšamo šmojtsichámuama botamana jtseuabnayëse y Bëngbe Bëtsá jtsatschuanayëse. ³Bëngbe Bëtsáftaca cha šmojtsencuënta ora, bëngbiámnaca chašmochtseimpadana, cha chaoma bënga fchayobenama Bëngbe Bëtsabe palabra Cristbiama entšanga jábuayenama, chë buayenana soye ndayama tempo entšanga ndoñe monjántatšëmbo. Atše chë buayenana soye entšanga abuátambaye causa, mora cárceloye sëntsëtámëna.

⁴Chcasna, Bëngbe Bëtsá atšbiana šmochtseimpadana, atše chayobenama chë buayenana soyënga entšanga jabuátambama, y chë soye atše chaima chënga corente tšabá catafjosertaycá, er atše šontsemna chca jamana.

⁵Šmochtsiyena nyetsca soyënga osertanánaca jtsamëse chë Jesucristbeñe ndošbuáchiyëngaftaca, y chca, nyets tempo ínÿenga šmochtsinÿanÿnaye tšëngaftanga Jesucristbeñe ošbuáchiyënga bëtsemnama. ⁶Inÿengaftaca chašmojtsencuënta ora, šmochtsama ntšamo šmojtsoyebuambnacá chëngbiama tšabá chaotsemnama, y

soyënga šmochtsichamo nyetscanga oyejuayana chamotsebomnama; y šmochtsetátšëmbo ntšamo cmojtsamna cada cánÿabioye jojuana.

Jtadióšoftanama

⁷Jesucristbeyeca bëngbe bonshana catšata Tíquico, canÿe trabajayá tšabe palabra bomná y Bëngbe Utabnabiama bëngaftaca oservená, tšëngaftangbioye noticiënga echanjuamba ndayá átšeftaca tojopasama. ⁸Chíyeca cha tšëngaftangbioye sentsichamná, chca, tšëngaftanga chašmotsetatšëmbuama ndayá bëngaftaca jojtsopasana, y cha chacmañëmuayama. ⁹Cháftaca Onésimo echanjá, Jesucristbeyeca bëngbe bonshana catšata; cha canÿe tšabe palabra bomná endmëna, nda tšëngaftangbiocana tonjánabo. Chata tšëngaftanga cmochanjácuntaye lempe ntšamo muiñe jojtsopasancá.

¹⁰Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tšëngaftanga ya buayenánënga šmontsemna ndayá jamama cmojtsamnana, Marcos tšabá jofjama, cha tšëngaftanga jautsëtsayama tojase. ¹¹Jesús, chë Justo cánaca uabainá, chánaca cmontsacheuaná. Quem pueblentša nyetsca judiënga ošbuáchiyënguentsana, nÿe chë unga átšeftaca mondëtrabája, Bëngbe Bëtsabe amëndayana entšángbioye chaóshjanguama, y chënga mondama atše ainaniñe bëts añemo chaitsebomnama.

¹²Epáfrasnaca cmontsacheuaná, inÿe tšëngaftangbiocá y cha Cristo Jesusbiana jatrabájama endoservena. Cha nyets tempo tšëngaftangbiama Bëngbe Bëtsábioye tša bochandbëtseimpadana, tšëngaftanga

Bëngbe Utabnábeñe ošbuáchiyana ndocna te chašmondájbanama, y nÿets tempo chašmotsiyena lempe jtsamëse, ntšamo chë Jesucristbeñe corente ošbuáchiyënga jtsiyenana yojtsamncá; y chca, tsëngaftanga corente šmochántsetatšëmbo ntšamo šmojtsamcá ndegombre yomna ntšamo Bëngbe Bëtsá yobošcá. ¹³Cach atše sënjinÿe y sëntsobena jayanama ntšamo cha jabuache yotrabájama, tsëngaftanga jujabuáchama, chë Laodicea puebloquënga y Hierápolis puebloca oyenëngnaca. ¹⁴Lucas, bëngbe bonshana ashnayá, cmontsacheuaná; y Démasnaca.

¹⁵Chë Laodiceoca Jesucristbeyeca catšátanga bëngbe cuenta šmochjácheuaye. Ninfábioynaca šmochjachuaye, y nÿetsca ošbuáchiyënga chë Bëngbe Bëtsá jëtschuayama chabe yebnentše

jénefnama imuamanëngnaca.

¹⁶Quem tsbuanácha chašmojualiá chentšana, Laodiceoca ošbuachiyëngbioye šmochjuíchmua, chócncaca mëcha chamualiamá; y tsëngaftángnaca šmochjualiá chë Laodiceoca ošbuachiyëngbioye tmonjanichmó tsbuanácha, chëcha tsëngaftangbioye chaojuáshjango ora.

¹⁷Arquipo šmochjauyana yejuana chaotsantješna chë Bëngbe Bëtsá tbojabonÿé trabajo sempre tsabá chaotsocumplínama.

¹⁸Atše Pablo, nÿe quem palabrënga tsëngaftanga jacheuayama cach atšbe cucuátšeca sëntsabiamná. Šmochtsenójuabnaye atše utamená stsemnama. Atše, Bëngbe Bëtsá sëntseimpadana, cha chaoma tsabe bendicionënga tsëngaftangbeñe chaotsemnama.